

# Tgi è Guy Morin?

In biling «verd» represchenta la miracla basileisa

DA GUIU SOBIELA-CAANITZ

■ **Tgi che legia n'ha forsea betg embli-dà la catastrofa da Schweizerhalle (1986). In incendi en la fabrica Sandoz aveva laschè ir 20 tonnas insecticid en il Rain.** L'aua dal flum purtava tonnas peschs crappads ed era impestada sin 500 km, fin en ils Pajais bass. Ins metteva en dumonda il futur da la chemia en la citad d'Erasmus. Quai era ina giada. 2009 han las industrias farmaceuticas strusch patì da la crisa; i fan ora 33% dal product social brut da Basilea-Citad (191 274 olmas) cun sias trais vischnancas Basilea, Bettingen e Riehen. Ma la citad renana ha anc autras atgnadads. 70 000 pendularis van vi e nà sur il cunfin: 16 000 vegnan da Frantscha, 14 600 da Germania, e blers auters lavuran tar filialas svizas en ils pajais limitrofs. A Basilea-Citad, cunzunt en il quartier da Kleinbasel, viva la pli gronda cuminanza islamica da Svizra (18 400 olmas, 9,7% da la populaziun), ma il chantun è l'unic da la Svizra alemana che ha refusà l'iniziativa populara cunter l'erecziun da minarets. Basilea-Citad ed il Vad (688 500 olmas) èn ils unics chantuns cun mintgin in president elegì per plis onns e ch'al represchenta anor. A Losanna è quai Pascal Broulis, da derivanza greca, ed a Basilea Guy Morin, che deriva dal chantun Neuchâtel. Il magazin «L'Hebdo» (Losanna) dals 29 d'avrigli ha deditgà sias pp. 18–19 ad in'intervista cun «Monsieur Bâle» manada da Tascha Rumley.



Guy Morin

## In'influenza multifara

Ils geniturs da Morin han bandunà lur chantun da fabricas d'uras per ir a lavurar en l'industria farmaceutica. Lur figl siemiava l'emprim da studis teologics, ma lur è'l tuttina vegnì medi; ussa sesa'l cun 54 onns en il Rathaus basileis, sut ils arvieuts da ses biro signuril illuminà da fanestras medievals. Ses collegas dal cussegl guvernativ l'han elegì 2008 president dal chantun e da la citad. Morin suttastritga la necessitad sociala dals medicaments «tant pli che la populaziun vegn adina pli veglia; (...) nosa economia basegna forzas da lavur ordvart cum-petentas, betg mo per l'industria, ma-

bain era per l'universitad ed ils ospitals'. Il president manegia pia che Basilea duaja far tut il pussaivel per retegnair ils tscharvels importads, cun ina spierta culturala ed ina qualitat da vita correspundentas, cunzunt grazia a las scolas internaziunalas (...). Morin superbi: 'Ils transports publics èn sviluppad uschè bain che la mesadad da nosa populaziun na posseda nagin auto' (...). Basilea sa splega oz sin trais stgalims: Il local, sco center da la Svizra dal nordvest en concorrenza cun il pol economic da Turitg e cun quel dal Lai da Genevra; il regional, aifer l'intschess dal Rain superiur, che sa confrunta cun Bruxelles, Berlin e Paris; l'internaziunal, sco center da perscrutaziun scientifica rival dal Massachusetts Institute of Technology (Boston) e da l'Universitad da Schanghai.» Tge avegnir per il president basileis? «El persunifitgescha sia regiun prosperaivla en in'extensiun adina pli vasta; el pudess duvrar questa sigliera per cuntanscher la funcziun suprema, tant pli che Basilea n'è betg pli represchentada en il cussegl federal dapi la demissiun da Hans Peter Tschudi 1973. Sco 'verd' avess Morin anc dapli vistas, damai che sia partida vegn baud a pretender sezza ina sedia. El commentescha en paucs ples: 'Cun 10–11% da l'electorat fiss quai il dretg mument. Areguard mia candidatura duai la partida decider; tut è avert'.» In «verd» biling che vegn ora bain cun l'excellenta industria da ses chantun, quai na fiss mal. Tgi sa?